



KEMENTERIAN EKONOMI
JABATAN PERANGKAAN MALAYSIA

KENYATAAN MEDIA BAGI PRESTASI EKONOMI MALAYSIA PADA SUKU TAHUN PERTAMA 2023

Ekonomi Malaysia bertumbuh pada 5.6 peratus disokong oleh permintaan domestik yang stabil dan pemulihan dalam pasaran buruh

PUTRAJAYA, 12 Mei 2023 – Keluaran Dalam Negeri Kasar (KDNK) Malaysia pada suku tahun pertama 2023 berkembang 5.6 peratus selepas mencatatkan pertumbuhan 7.1 peratus pada suku tahun sebelumnya. Bagi terma pelarasan musim suku tahun ke suku tahun, KDNK meningkat marginal sebanyak 0.9 peratus (ST4 2022: -1.7%) pada suku tahun ini. Sejajar dengan itu, prestasi ekonomi bulanan berkembang sederhana pada suku tahun pertama dengan pertumbuhan 4.6 peratus pada Januari, diikuti 6.6 peratus pada Februari dan 5.6 peratus pada Mac 2023. Jabatan Perangkaan Malaysia (DOSM) melaporkan hari ini dalam siaran **Keluaran Dalam Negeri Kasar (KDNK) Suku Tahun Pertama 2023**.

Menurut Ketua Perangkawan Malaysia, Dato' Sri Dr. Mohd Uzir Mahidin, "Prestasi ekonomi pada suku tahun pertama 2023, dari segi penawaran dipacu oleh kesemua sektor khususnya sektor Perkhidmatan, Pembuatan dan Pembinaan. Dari segi permintaan, Perbelanjaan penggunaan akhir swasta dan Pembentukan modal tetap kasar terus memacu pertumbuhan ekonomi pada suku tahun ini".

Beliau menambah, "Dari segi prestasi sektoral, sektor **Perkhidmatan** merupakan penyumbang utama kepada ekonomi Malaysia, meningkat 7.3 peratus (ST4 2022: 9.1%) pada suku tahun pertama 2023. Prestasi memberangsangkan ini disumbangkan oleh subsektor Perdagangan borong & runcit (9.4%), Pengangkutan & penyimpanan (17.0%), Perkhidmatan perniagaan (16.2%) dan Makanan & minuman dan penginapan (12.0%). Perkembangan kukuh yang dicatatkan dalam Perkhidmatan perniagaan di dorong oleh agensi pelancongan dan aktiviti berkaitan pelancongan, berikutan peningkatan ketibaan pelancong. Bagi terma pelarasan musim suku tahun ke suku tahun, sektor Perkhidmatan meningkat 1.7 peratus (ST4 2022: -1.5%)".

Sektor **Pembuatan** berkembang sederhana 3.2 peratus (ST4 2022: 3.9%) pada suku tahun pertama 2023 dipacu oleh Produk elektrik, elektronik & optikal (3.8%) diikuti oleh Peralatan pengangkutan, pembuatan lain dan pembaikan (7.7%) dan Minyak & lemak daripada sayuran & haiwan dan proses makanan (7.2%). Sebaliknya, Produk kayu, perabot, kertas & produk kertas dan percetakan mencatatkan penurunan 4.0 peratus

(ST4 2022: -2.6%). Bagi terma pelarasan musim suku tahun ke suku tahun, keseluruhan sektor Pembuatan meningkat 0.5 peratus (ST3 2022: -2.6%).

Sektor **Pembinaan** berkembang 7.4 peratus (ST4 2022: 10.1%) pada suku tahun pertama 2023. Prestasi sektor ini disumbangkan oleh pertumbuhan positif dalam Kejuruteraan awam (15.9%), Aktiviti pembinaan pertukangan khas (8.7%) dan Bangunan bukan kediaman (6.4%). Walau bagaimanapun, Bangunan kediaman menyusut 3.4 peratus (ST4 2022: 2.8%). Bagi terma pelarasan musim suku tahun ke suku tahun, sektor Pembinaan meningkat 2.9 peratus (ST4 2022: -4.1%).

Sektor **Perlombongan & pengkuarian** meningkat 2.4 peratus (ST4 2022: 6.3%) disokong oleh kesemua aktiviti terutamanya subsektor Minyak mentah & kondensat yang meningkat 4.0 peratus (ST4 2022: 4.3%) pada suku tahun ini. Manakala, Gas asli bertumbuh pada kadar perlahan sebanyak 0.6 peratus (ST4 2022: 7.3%). Bagi terma pelarasan musim, sektor ini menurun 3.2 peratus (ST4 2022: -2.4%). Di samping itu, sektor **Pertanian** meningkat marginal sebanyak 0.9 peratus (ST4 2022: 1.1%) pada suku tahun ini disokong oleh prestasi yang lebih baik dalam subsektor Kelapa sawit (3.4%) dan Pertanian lain (2.6%). Sektor pertanian mencatatkan penurunan 2.5 peratus (ST4 2022: 2.0%) bagi terma pelarasan musim.

Mengulas lanjut dari segi permintaan, Ketua Perangkawan Malaysia menyatakan bahawa "**Perbelanjaan penggunaan akhir swasta atau isi rumah** yang menyumbang 61.5 peratus kepada KDNK, meningkat 5.9 peratus (ST4 2022: 7.3%) disokong oleh penggunaan yang lebih tinggi dalam Pengangkutan (11.2%) diikuti oleh Perumahan, air, elektrik, gas & bahan api lain (8.9%) dan Makanan & minuman bukan alkohol (3.4%) pada suku tahun pertama 2023. Bagi terma pelarasan musim suku tahun ke suku tahun, prestasi keseluruhan Perbelanjaan penggunaan akhir swasta mencatatkan peningkatan 2.0 peratus (ST4 2022: -2.6%)".

Pembentukan modal tetap kasar (PMTK) atau pelaburan ke atas aset tetap meningkat 4.9 peratus (ST4 2022: 8.8%) pada suku tahun ini. Prestasi PMTK disumbangkan oleh Struktur (7.5%), Jentera & peralatan (2.6%), manakala Aset lain menguncup 0.3 peratus. Berdasarkan PMTK mengikut sektor, kedua-dua sektor Awam dan Swasta merekodkan peningkatan pada suku tahun pertama 2023. Bagi terma pelarasan musim suku tahun ke suku tahun, PMTK mencatatkan penurunan 1.4 peratus (ST4 2022: 0.1%).

Perbelanjaan penggunaan akhir kerajaan menyusut 2.2 peratus (ST4 2022: 3.0%) dipengaruhi oleh pertumbuhan perlahan dalam perbelanjaan bagi bekalan dan perkhidmatan. Bagi terma pelarasan musim suku tahun ke suku tahun, Perbelanjaan penggunaan akhir kerajaan menurun 1.7 peratus (ST4 2022: -1.0%) pada suku tahun ini.

Beliau juga menyatakan bahawa “**Eksport bersih** kekal positif pada 54.4 peratus berbanding 23.0 peratus pada suku tahun keempat 2022. Momentum ini dipengaruhi oleh kejatuhan sebanyak 6.5 peratus (ST4 2022: 7.2%) dalam **Import** berbanding **Eksport** yang menyusut 3.3 peratus (ST4 2022: 8.6%). Prestasi ini disebabkan oleh kemerosotan eksport dan import barangan.”

Di peringkat global, ekonomi dunia terus mengalami ketidakpastian akibat inflasi yang tinggi. Di rantau ASEAN, KDNK bertumbuh pada kadar lebih perlahan terutamanya Viet Nam dan Filipina masing-masing mencatatkan pertumbuhan pada 3.3 peratus (ST4 2022: 5.9%) dan 6.4 peratus (ST4 2022: 7.1%). Di samping itu, berdasarkan anggaran awalan, ekonomi Singapura bertumbuh 0.1 peratus (ST4 2022: 2.1%) pada suku tahun ini. Sementara itu, KDNK Indonesia kekal meningkat 5.0 peratus.

DOSM akan mengeluarkan anggaran awalan KDNK bermula pada suku tahun kedua 2023. Anggaran awalan ini merupakan inisiatif yang dilaksanakan oleh DOSM untuk memberikan gambaran prestasi ekonomi berdasarkan data bulanan yang diperoleh melalui survei dan data pentadbiran.

Di peringkat antarabangsa, anggaran KDNK awalan dibangunkan untuk memenuhi permintaan bagi statistik makroekonomi bertepatan masa yang memberi manfaat kepada sektor awam dan swasta. Kebanyakan negara maju iaitu Amerika Syarikat, United Kingdom, Korea Selatan, Taiwan dan Singapura telah mengamalkan statistik ini. Oleh itu, usaha ini menunjukkan komitmen DOSM dalam menyediakan petunjuk makroekonomi bagi membuat perancangan dan penggubalan dasar, analisis ekonomi, unjuran dan perancangan pembangunan perniagaan.

Jabatan Perangkaan Malaysia (DOSM) sedang menjalankan Banci Ekonomi pada tahun 2023. DOSM amat menghargai kerjasama daripada responden dalam memberikan maklumat kepada DOSM serta menjayakan banci ini. Sila layari www.dosm.gov.my untuk maklumat lanjut.

DOSM telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data. OpenDOSM NextGen ialah platform perkongsian data sumber terbuka dan boleh diakses melalui portal <https://open.dosm.gov.my>.

Embargo: Hanya boleh diterbitkan atau disebarikan mulai jam 1200, Jumaat, 12 Mei 2023

Dimaklumkan bahawa Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah *“Connecting the World with Data We Can Trust”*.

Diterbitkan oleh:


PEJABAT KETUA PERANGKAWAN

JABATAN PERANGKAAN MALAYSIA

12 MEI 2023


LAMPIRAN 1

**Carta 1: Keluaran Dalam Negeri Kasar (KDNK),
ST1 2020 – ST1 2023 dan 2018 – 2022**




Sumber: Jabatan Perangkaan Malaysia

Carta 2: Pertumbuhan KDNK Tahunan (%)




Sumber: Jabatan Perangkaan Malaysia

Carta 3: Pertumbuhan KDNK Bulanan dan Suku Tahunan (%)




Sumber: Jabatan Perangkaan Malaysia

Carta 4: Pertumbuhan KDNK Suku Tahunan mengikut Jenis Aktiviti Ekonomi, ST4 2022 & ST1 2023




Sumber: Jabatan Perangkaan Malaysia

Carta 5: Pertumbuhan KDNK Suku Tahunan mengikut Jenis Perbelanjaan, ST4 2022 & ST1 2023




Sumber: Jabatan Perangkaan Malaysia

Carta 6: Pertumbuhan KDNK Bulanan Mengikut Jenis Aktiviti Ekonomi, Januari - Mac 2023




Sumber: Jabatan Perangkaan Malaysia

Carta 7: KDNK Pelarasan Musim (Perubahan Peratusan dari Suku Tahun Sebelumnya), ST2 2015 – ST1 2023



Sumber: Jabatan Perangkaan Malaysia

Carta 8: Pendapatan Negara Kasar (PNK) Per Kapita, ST1 2019 – ST1 2023



Sumber: Jabatan Perangkaan Malaysia

Carta 9: Perbandingan KDNK dengan Negara Terpilih (%)

KDNK (Pertumbuhan YoY, %)	2021	2022	2021				2022				2023
			ST1	ST2	ST3	ST4	ST1	ST2	ST3	ST4	

NEGARA ASEAN TERPILIH

 Malaysia	3.3	8.7	-0.2	16.2	-4.2	3.6	4.8	8.8	14.1	7.1	5.6
 Singapura	8.9	3.6	3.9	17.3	8.7	6.6	4.0	4.5	4.0	2.1	0.1
 Indonesia	3.7	5.3	-0.7	7.1	3.5	5.0	5.0	5.5	5.7	5.0	5.0
 Filipina	5.7	7.6	-3.8	12.0	7.0	7.9	8.0	7.5	7.7	7.1	6.4
 Viet Nam	2.6	8.0	4.7	6.7	-6.0	5.2	5.1	7.8	13.7	5.9	3.3

NEGARA LAIN TERPILIH

 Amerika Syarikat	5.9	2.1	1.2	12.5	5.0	5.7	3.7	1.8	1.9	0.9	1.6
 Kesatuan Eropah	5.4	3.5	-0.7	13.8	4.3	5.2	5.7	4.4	2.6	1.7	1.3
 United Kingdom	7.6	4.1	-7.7	24.4	8.5	8.9	10.6	3.8	2.0	0.6	t.t
 Republik Rakyat Cina	8.4	3.0	18.7	8.3	5.2	4.3	4.8	0.4	3.9	2.9	4.5
 Republik Korea	4.1	2.6	2.2	6.2	4.0	4.2	3.0	2.9	3.1	1.3	0.8

Nota: t.t – tidak tersedia

Sumber: Laman web rasmi Agensi Statistik Negara Terpilih